

【賣菜】謝惠如原作

記得讀三年生該下，屋家人口多，食、用開銷也大，阿姆除了做田事還愛治理屋家人个三餐，斯利用屋側角該埕空地來種菜，種啊種，菜嘅多都食毋去，高不將載去街路賣。

九月冬十月禾割撇了後，一個寮日阿姆喊偌跣佢去搨賣菜，到菜市場个路脣，阿姆撐好鐵馬，將後架疊都尖起來个角菜，落十外抓¹落來喊偌在該掌緊賣，無講橫無講直自家斯隨載去街路迴迴轉賣咧，抨偌²一個人在該呆呆，毋知愛仰結煞正好。

偌本來面皮斯薄，見看著毋熟事个人斯會面紅濟借，莫講愛喊人買菜，無結無煞个偌，敗勢去頭犁犁，全毋敢探起來看人，好得隔壁賣番薯个老伯姆看偌恁恬又畏事，笑笑講：「細阿妹，毋使驚，你做你大聲喊賣菜，人若聽著斯會撇轉來看你賣麼个，無定著有佢想愛買个菜，鴨嫲嘴愛罔吮正好有好食，來！偌喝分你聽：『來唷！來買番薯唷！好食个番薯又粉又甜，包你食了還會倒轉來買唷！』」聽著老伯姆个喝賣了後，偌斯膽膽試喊：「來

唷！來買菜哦！一抓十個銀貳等。」正喊啊煞，一個阿姨聽著隨停落來買，還褒偌恁乖恁曉得。聽著厥个安謐，偌暢都緊喝緊大聲，行過吾面前个人，十個有八個大體會停落來同偌買菜，無幾久斯賣撇咧，分偌試著賣菜一屑都毋會難。

冬下頭日短，臨暗放學轉到屋家，鞋一脫衫一換，隨走去菜園同阿姆搨摘菜。暗晡頭食飽夜了後，同阿哥兩個人擇菜、秤菜，吾等負責个事頭，除了將一頭一頭有黃葉同燥葉个菜蓋³愛擘撇以外，還愛將有泥个菜蓋搨搨嚟，整理清淨好勢了後，一抓一抓秤畀平重正綳起來。阿姆不時交代吾等：「有東西好賣，斤兩定著愛秤罈，雖然正十箍八角又乜係錢，秤頭斯係路頭，毋好去批著人。還有，賣食个東西，自家愛敢食正好拿去賣人。」這兜話偌全記在心肝肚。

賣菜雖然係一種小生理賺毋成錢，也無麼个大學問，毋過對這擇菜、賣菜个過程中，分偌學著已多做人做事个道理。

¹ 落十外抓：音 log` shib` nguai` za+；解下十多把。

² 抨偌：音 biang+ ngai~；丟下我。

³ 菜蓋：音 coi` hab^；老菜葉、外葉。